

GAU LUZEA. Asteazken arratsaldean NUPeko gela bitan itxialdia egin zuten lagunek hamabi ordu igaro behar izan zituzten Iruñeko komisarian, atxilotuta. Ia denentzat ziegetara lehen bisita zen. Hona hiru lekukotza.

JUANJO ZUBIRI IRAKASLEA

«Jendea arrastaka, kolpeka eta iletik tiraka atera zuten»

Alberto Barandiaran | IRUÑEA

Juanjo Zubiri izan zen, Enrike Galarzarekin batera, itxialdian parte hartu zuen irakasleetako bat. Poliziaren aurrean bozeramailearen papera jokatzea egokitu zitzaion herenegun, gainera, eta, dioenez, guztiz neurritz kanpokoia izan zen erantzuna.

■ Nola erabaki zenuen itxialdian parte hartzea?

Ikasleen proposamena iritsi zitzaigun, eta iruditzen zitzaidan, euskararen aldetik hartzen ari diren erabaki larrien guztiengatik, aproposa izan zitekeela.

■ Errektoretza taldetik esan dute horrelakorik ez dela zilegi unibertsitatean.

Unibertsitatea ikasteko tokia da, baina baita bizitza unibertsitarioaren barruan sartzen diren hainbat gauzetarako ere. Ez dakit ilegala izango den, baina iruditzen zait protesta egiteko modu bat dela, eskubidea beraz. Horrelako erreakziorik ez genuen espero ordea.

■ Nola igaro zenuten gaua?

Sartu eta berehala eztabaidatu genuen hainbat gai, lasai; eta gauerdia aldera iritsi zitzaigun berria Polizia bazetorrela. Bilatu ginen gela batean eta komisarioak esan zigun ilegala zela,



MIKEL SAIZ

eta bazuela agindua errektore-arena gu kanporatzeko. Guk erabakia genuen ez ginela identifikatuko, eta orduan esan ziguten atxilotuta era-

mango gintuztela. Hori izan zen gogorrena, jendea arrastaka, kolpeka atera zuten, eta mehatxu eginez gainera. Izu-garri luzea egin zen, 00:30ean

iritsi eta 03:30ean sartu zelako azkena komisarian.

■ Komisarian pilatuta eduki zintuzteten.

Jakina, beheko solairuan hamar ziega gaude, oso txikiak, eta zortzina lagun sartu zituzten, eta hori asko da. Denak sartzen ez ginenez, pasabideetan ere lagun asko egon ziren.

■ Ez da ohiko egoera egun bakar batean unibertsitateko ikasleen %1 edo fitxatzea. Nola baloratzen duzue NUPen egun bizi den egoera?

Nik uste dut adjektibo guztiak jarri zaizkiola dagoeneko. Ikasleek antolatu zuten horrelako ekintza baketsuarekin horrelako neurriak hartzea guztiz neurritz kanpokoia da, eta erakusten du unibertsitate honek duen jarrera. Betidanik egin dira itxialdiak, eta ez da ezer gertatu, baina hemen sekulakoa antolatu dute.

AINARA ORKIN IKASLEA

MIKEL SAIZ

«Poliziak esan zigun errektoreak eman zuela gu kanporatzeko agindua»

A.B. | IRUÑEA

Ainara Orkin izan zen itxialdia burutzea erabaki zutenetako bat.

■ Zer dela eta itxialdia?

Irakasletzakoek proposatu zuten, haiek kezka dute-eta hurrengo urtean ikasketak kenduko ote dituzten. Nahi genuen zerbait ikusgarriagoa egin, langileak eta irakasleak ere batzeko.

■ Luzea izan zen gaua.

Gauerdian, ikustean Polizia ez zela agertu, uste genuen ez zirela etorriko, baina handik gutxira furgonetak ikusi genituen. Erabakia genuen NANA ez genuela erakutsiko, eta orduan atxilotetak etorri ziren. Esan ziguten errektoreak berak eman zuela agindua

■ Zuetako gehienentzat kartzela ikusten zenuten aurreneko aldia zen.

Nik ez nuen ezagutzen, eta iritsi ginen —ni izan nintzen azkenetakoa— jende guztia pilatuta zegoen, motxilekin eta paretetara begira—. Nahas-mahas handia zegoen, txanda berriko poliziak etorri eta «baina, zer da hau!» galdetzen zutelako haiek ere, jendea bokatak hartzen, lurrean, ikusten zutenean.

■ Hemendik aurrera, zer?

Orain ikasturtea bukatzen ari da, baina hurrengo ikasturtean jarraitu egin beharko dugu, eta beharrezkoa izango da irakasleekin eta langileekin elkartzeko.

CARLOS IBAÑEZ NUPEKO LANGILEA

MIKEL SAIZ

«Ekintzak hainbatengan piztu du orain arte ez zegoen mobilizatzeko grina»

A.B. | IRUÑEA

Langileen aldetik euskararen gaiarekin dagoen sentsibilizazio handia azpimarratu du Carlos Ibañezek.

■ Espero zenuten Polizia etorri eta denak atxilotuta eramatea?

Nik ez nuen espero. Uste nuen ez zegoela inolako aitzakiarik gu denak atxilotuta eramateko, guztiz baketsua zelako, eta lasai ginelako bi gela horietan. Baina argazkiak egin, hatz markak hartu, eta fitxa guztiak egiteko aprobetxatu zuten.

■ Nola ikusten da langileen artean euskararen egoera NUPen?

Jendeak garbi dauka atzerapauso handiak ematen ari direla, batez ere

prestatzen ari direna ikusita, eta mobilizatu beharra daukagula. NUPerako euskararen lege berria kolpe latza izango da.

■ Ikasleek eskatu dute irakasleen eta langileen elkartasuna.

Eta izango dute. Bart gauekoa oso gogorra izan da, eta hainbatengan piztu du orain arte ez zeukaten mobilizatzeko grina. Elkartasun dei asko jaso ditugu.

■ Ze harreman bide izan daiteke errektoretza taldekoekin?

Oraingo errektorearen taldearekin hitz egiteko biderik ez dut ikusten. Autonomia unibertsitarioa ez da existitzen eta nahi dutena egiten dute. Esperantza gutxi daukat nik.